

行有恆堂初集 卷上

書

道光戊申九月

六子恒齋詩集

臨潢柏後敬題



道光二十八年九月開雕



行有恒堂諸作樹義正大寄興高遠鍊詞新
警用筆健捷非苟爲逞妍摛藻者易曰脩辭
立其誠所以居業也先儒謂脩省言辭立其
誠信蓋必實脩職業而後發爲文辭不涉浮
靡也憶自嘉慶戊辰入直

上書房獲侍講席屬句穎秀自幼過人今者宣力
機要每於

彤闈

螭陛間握手立談數語輒以道誼相切劘不以文

辭相矜尙而退食之暇藉六義以理性情蓋
本立誠以脩辭斯言之所以有物也立誠之
功與年俱進則脩辭之詣亦與日俱深矣

道光八年戊子八月湯金釗謹識

行有恒堂主人見示大集高雲入情朗月在
抱策鯨鼈於文海披菡萏於筆江靡體不工
厥采殊茂夫東平奏頌北海善書元佐裸玉
之章子良高松之賦並足扇芳前載擢穎宗
枝以古方今洵難專美至若知止誠意諸論
灤陽帝京諸篇更能弁冕詞林勃窣理窟承
華珪社毓秀璿源捧覽之餘仰佩無旣
道光壬辰上冬江陰何春煦謹題於春明寓

齋

大集高渾精深風格雋上是能探源漢魏得
力於唐宋大家而自闢畦畛者元音一振凡
響收聲實爲詞壇宗匠欽服之至
道光甲辰孟春潘世恩拜讀謹識

序

定邸天姿英邁學有本原才氣高超事理通
達宜其邀

知遇而資

倚任者數十年於茲矣憶癸巳歲曾奉揀選讀祝
官之

命彼時恬任奉常因得襄事

闕廷瞻丰采而聆言論其平日景慕之忱藉以
少慰焉近十年間同奉

命訊案者一大挑舉人者一恭修

玉牒者一盤查內外庫者二留京辦事者三見理之
明敏處事之精當追陪既久欽佩尤深偶于
公所得暇所言皆天下國家身心性命正經
道理凡

國朝掌故與夫詩古文詞無不津津樂道洵足
擴充聞見受益良多間以所著五七律見示
氣格迥上吐屬風雅雖古賢王之好學何多
讓焉今許少珊葉潤臣兩中翰謹輯古今體

詩若干首付諸剞劂特任校讐之役屬爲製
序竊媿學殖荒落不足贊揚盛美然又不敢
固辭捧讀之餘典重高華無體不備愈見平
日所津津樂道者皆發揮於是編擴充聞見
誠非淺鮮從茲傳播藝林其所益更當何如
耶戊申五月卓秉恬謹序

序

行有恒堂詩集迺定邸公餘清暇抒寫性靈積軸旣繁彙次成帙者也曩歲退直激懷得窺傑構賦傳落葉詞妙粲花嚴霜欲飛商飈乍起肅肅之氣鬱乎行間蕭蕭之聲撼於紙上劉舍人所謂擬諸形容象其物宜者非耶然而寸莛偶撞莫奮鯨吼片羽獨攬未測鳳苞鸞許鼎嘗斑猶管見頃緣

命稽左藏幸陪德輿適當鉅集之哀屬以小言之

綴今夫丹九還而見寶劍萬灌而稱神河間
之大雅羣欽東平之爲善久著鍊年不輟頴
詣斯精 定邸涵茹風人杼軸意匠剴今騁
路轢古窮塵淵源乎三百篇規重矩疊編排
者四十載櫛比纚連並仙霞九光喬雲五色
然龍燭而映日舉翠旂以拂霄蔚矣鴻裁允
爲雅什冲襟恒接麗句尤耽情自攄乎浣薇
味益甘於啖蔗金鏘玉夏欣聞廣樂之張筵
弄匏宣敢作引喞之導

道光二十八年夏至後三日壽陽祁雋藻謹

識

行有恒堂初集卷上

定郡王著

神霽雨

赫赫炎歊蘊蒸方始惟雨咸宜黍稷茂矣南畝農
夫載欣載喜勤我鋤耔息我耒耜黽勉農人各慎
乃畛稂莠萃萃螟螣牲牲既耘既捕多稼蓊蓊豈
弟君子壽考且仁既閒我牛息止綠野或牧於坡
亦在林下稚子耄夫樸淳而雅禮禔謁蓬頭逍遙長
夏黍稌芄芃稷稻叢叢祈雨而雨感彼蒼穹潤霑
甘澍愜解薰風預卜有年以稔且豐

古意二首

我有一樽酒贈爾行路人感君良意厚數語向君
申前途正顛險愛惜千金身別易會面難天涯誰
爲親風土故鄉異志士德是鄰江海多風波揚帆
貴知津

明月出東海浮空皎皎光誰家砧杵韻就月擣衣
裳擣衣欲寄遠遊子行未返壯士輕別離長途多
偃蹇達者貴自新莫嗟時光晚黃鵠志千里晨夕
加食飯

寓意

今古一局棋日月亦何速滄海舊桑田邱陵新岸
谷天地無窮期年華去不復人事無常恒君子貴
慎獨青春樂富貴白髮哀窮蹙但識得者歡休言
失者哭轉使得失心悄悄愁成斛

人生無百年其間多偃仰誰解夢中身幾作出塵
想造物忌太潔處心貴坦蕩豈不懷幽人何苦傷
神往天地盈虛理亦任自消長聞道蓬萊山雲中
不可上

心如珠在淵淵深多寂靜飛鳥度深潭波中自留
影鳥豈欲留痕無心須自省明鏡本空虛觸物皆
成境

琴學久已廢宮商竟誰師操縵空有存佳音誰復
知我自用法無絃亦其宜高山流水心月白風
清時百慮寂復寂心神任所之淡泊多遠懷囂塵
不可移

杞人自憂天此憂何日了精衛填海忙不知銜石
小月落萬山昏日出扶桑曉世界本無爲庸人徒
自擾屈指幾英雄事業成多少

聞說紫靈芝生當衆山谷虛無上乘仙采采朝夕
服服此大道成千年常辟穀人跡罕能至雲氣互
往復饑蛇當道行猛虎高峯伏且莫求長生願身
處平陸快然樂天真吾生終碌碌

登高覽九垓始知吾眼隘天際渾然空山川自然
畫滄海納百川長江限地界雲從足下生日向空
中挂俯視山下人微哉一蒂芥

盈虛各循環吾生亦何有少壯不數年轉瞬成白

首欲遣胸中愁唯有杯中酒英雄一念差遺笑千
年後太古無爲時而今仰望久心鏡本無塵濯磨
去纖垢緊繫光明珠勿使乘虛走榮辱何足搖大
道常保守全受許全歸此爲真不朽浩氣本性初
無負乃无咎

擣衣用明何景明韻

露下秋氣高遊子悲薄衾夜漏何迢迢黃昏涼氣
侵大火已西流節序屆商金誰家明月下獨自擣
清砧手中聲緩急心緒隨浮沈遠隔不相見猶如

商與參中夜時忘倦更深力不任匹練製成後將
此懷遠心會期雖渺渺思意良深深寄茲聊禦寒
豈惜千萬鍼一鍼一墮淚不覺沾滿襟

夏日卽景

新蟬深樹鳴小坐紗窗靜幽篁解籜初風來動清
影茶濃泉味甘香燼爐灰冷細讀古人書銷此炎
歎永

聞蟬三十韻

新蟬噪高樹蛻甲早無雙來牟初刈穫黍稷已耕

糞蟻蝨感長養勇銳氣不懣轉丸車轍中輪轂勢
可扛有如鹵莽人傲岸恃豐彫渾然純天真遇物
皆撐攃薄翼奮夜飛迎人腹背撞審知無眼鼻喜
臭愚且眈五技遜螻蛄差勝蠕蠕虵一朝遂羽化
禪通氣自降辭穢就清潔皈依禮義邦居高翳綠
葉蔽體儼麾幢顧愷珍翳葉靈寶押其翫五德陸
雲賦八名風土哢柳密多臨水槐茂蔭當窗曉露
日未晞飲若吸西江勝鳴發新響流水聲淙淙靜
擬琴鏗戛細訝珮琤琤幽咽寒松韻清冷鐵笛腔

上元爭剪綵摻手燒銀釭縛蟬小於蛾紛紛垂露
躩附陽遂化育宜男信誠恠長林適所欲須慎螳
目眈黃雀更在後枝上潛踪躩同類善相傾求友
戒羿逢夏至過不鳴其乃應黜黜貴臣見放逐梁
棟摧長杠不解春與秋豈待成徒矸生暑復枯寒
朝菌處朽椿晝靜哦新詩徘徊足韻登

團扇篇

皎皎新紈素珍重裁團扇繪出雙鴛鴦茵苔明紛
絢碧重葉爭敷紅鮮花勝茜長夏引薰風搖拂招

涼院相愛復相親袖懷頻顧眷物各貴有時鑪火
徒勞美消長慎盈虛莫恃恣專擅繁暑總能祛清
涼亦可援微功雖足徵佳處失周遍引寒入肌膚
翳影多遮面憎喜紛參差漸覺提攜倦大火屆西
流尾星昏中見爽氣應候生露下炎涼變木落朔
風揚轉瞬霏霜霰良時難再來拋棄憐輕賤三復
婕妤詩令人增慕戀

雨

炎熱尙未歇節序已新秋陰雨何滂沱油然四面

稠泥淖滯行人潢潦縱橫流連緜勢難止百道盈
澮溝高軒足溽濕下處屋如舟稼穡幸無傷差免
農夫憂繁陰翳日光地氣相蒸浮鬱結無時蘇商
羊舞不休安得涼風來千里聲颼颼橫吹大野乾
坐見雲霧收

日出東南隅行

曉日出東南照見西北隅西北何所有城市坦通
衢高樓大道旁門掩黃金鋪庭廣深閨邃有女如
羅敷新月儼修眉冰雪爲肌膚雲髻飾翠翹繡作

行在恒堂初集卷上
合歡襦及笄婉窈窕韞櫝藏瑾瑜隣曲衆所聞容
貌絕世無爭與爲媒妁願早嫁金夫淑女靜且默
珍重此身軀古訓貴守正篤義如名儒展轉久未
字時邁傷嗟吁惟怨妾命薄老却傾城姝紅顏不
復返蘭蕙悲荒蕪甘苦齊領畧詎辨薺與荼永夜
處孤幃夢醒空踟躕禮誠防閑邪豈可離斯須不
如村野女早嫁遂歡愉荆布宜室家寒暑安勤劬
寄言同志女慎莫待賈沽

大堤曲

窈窕襄陽女家住大堤頭駕言游何干放棹蕩輕
舟薄暮旋閨中拜月下高樓迤邐步庭除更深良
夜幽徘徊望銀漢佇立俯夷猶靜女豈善懷有感
引長愁今朝采芙蓉覩彼涕盈眸爛漫朱華穠水
上明霞浮鮮艷耀初日碧葢冒汀洲旣沾雨露渥
况復馨香稠及時不采摘芬馥難淹留焜黃顏色
衰轉瞬悲清秋誰謂紅芳久歲月去如流妾貌正
如花使我增心憂

短歌行

天上團團月光彩到人間明月自終古無意照塵
寰望月動長懷世事良多艱悲歡與離合消長迭
往還今我胡不樂守分遠憂患壯年能幾時何苦
促朱顏幸際唐虞盛况乃身心閒而無愁緒擾且
免髣毛斑

靜坐一首

掩卷罷觀書无妄煩慮靜無言默坐時動定交相
省敬義兩夾持惺惺須自警物過鏡呈形鳥渡潭
留影心性本常存慎勿教馳騁

種麥行

去秋雨愆期入冬復稀雪宿麥茁春疇苗萎橫風
折發生賴甘霖農顛方饨切密雲起西郊雷殷電
光瞥跋扈土囊口雨勢竟中輟勾出萌達時莫當
赤日烈穀價日以昂姦蠹恣饕餮致使

黃屋憂翻先鵷鸞列籌畫遍多方建白俯采掇吁
嗟鮮食民謀身力苦竭浩蕩荷生成賑糶隨宜設
吏役紛如毛豈能盡賢哲康濟

宵旰殷政治咸罔缺如何旱頻仍其究義莫揭不

聞鳩逐婦安見鶴鳴垤愧乏智者智素餐徒餽啜
愁緒大江流欲搯不可絕來牟倉庾虛畫餅終難
說

鄭邸小飲

微雪滿天地把酒話平生嘉穀紛羅列甘旨詎絮
羹暢言歡且和旣醉仍飛觥夙昔幸御李非比初
識荆古人重一諾俯視山岳輕大雅出風塵慷慨
達士情論畫衆意表評書妙復精真跡富鑒賞誠
乃擁百城旣許投義氣還期慎滿盈所慚樗櫟質

恐累知人明

靜夜

更深羣動息夜氣得操存萬慮俱未發涵養其根
源天理渾然處寂滅難共論靜中滋味純領會默
忘言

題蘆溝曉月圖用明趙寬韻

殘星夜半稀疎明桑乾波浪聽流聲橋平雁齒霜
勢重車馬蕭蕭重行行蒼煙淡宕接天迥對岸依
稀見人影欲曉未曉鴉亂飛斜光忽看落西嶺

競渡歌

水明於鏡曉光新十雨五風應候勻岸柳凝煙青
蒲短舟行儼似畫中人萬櫓搖搖初日煖蘭橈漫
渡花腔緩宛轉歌喉響徹霄笛聲吹裂流雲斷綵
旗蕩漾炫光華波中倒影印交加鼓催齊拍龍舟
急船裏人衣溼浪花或隱深蘆或旋繞歌罷緩行
聲悄悄迴船放棹入煙波晴旭剛斜風裊裊

古柏歌

昔年黛色聳參天枝葉凝碧十畝煙老榦虬龍鱗
甲重覆陰森密何巍然大匠論材廟堂器棟梁之
質凡材異天家唯以儉爲德不事經營妨農事大
材無用日已深漸枯終受繁枝累野火頻燒葛藟
纍一朝萎頓成暴棄樵人採伐韻丁丁帶葉束枝
一擔橫斧斤旦旦無時歇惜此嘉材勢欲傾剩得
枯株雨露乏更兼霜雪損堅貞嗟哉無復昔年意
總有春光亦不榮嶮峻峯坳人不見林深古木山
中遍千載萬載任青青處地不良緣自賤

少年行

行在恒堂祿集
長安遊冶誰家子駿馬驕行落花裏金鞍玉勒錦
障泥芙蓉寶劍含秋水朝沽美酒踏青游暮宿青
樓挾美妓金釵羅列自成行容顏嬌艷花相似洞
房宛轉管絃繁舞衣嫋娜隨風起酒酣面熱赭顏
紅兕觥滿酌氣如虹玉山欲倒嬌無力歌吹送入
夢魂中日高三丈睡初覺錦衾角枕暖氣融整頓
衣冠向何處又醉大堤東復東游宴無休日復夜
連豐甲第凌雲榭歌舞生涯自在身此身不許長
閑暇珠玉爲家錦作鄰一番裝飾一番新春秋佳

日雖無幾總作朝朝不老春嗟哉轉瞬流年急榮
華不久百憂集白髮頻催老病來憶昔光陰淚痕
溼

夏夜

人靜黃昏夜氣清輕颺薄暮引涼生扶疎夏木翠
欲滴深淺煙光畫不成是時園林初過雨千樹萬
樹新蟬鳴好風徐捲濃雲去送出團團海月明露
重流螢低不起更深夜久天如水清淺池塘波不
與明星遙沒銀河裏披襟獨步自徘徊隔岸荷香

行在恒室祕集
廿四
冉冉來月到天心人影直花陰細碎印莓苔

蟋蟀吟

秋風清秋月明夜涼蟋蟀來悲聲悲聲斷續情如
訴行人懊惱聽蛩語草間白露下團團銀河漸沒
明星闌欲曉未曉東方白晨光偏照征途客一鞭
前指途路長萬縷柔情客心窄蟋蟀啼秋秋意深
思長夢短遙空碧

秋陰登醫巫閭山觀音閣

石迴松抱峯巒秀瀑流飛迸珍珠漱畫磴披開境

界幽冷然拂面風聲驟曲徑彎環澗水冷山巔俯
視萬松青秋重野林餘碧暗峭石懸空結小亭我
來一洗塵土氣爰從靜境生滋味習習清風拂袂
過樹色山光紛蒼蔚遙望平沙接海邊村落人家
幾點煙蒼茫不變天水色霧靄直與峰頭連陣雲
低掩羣山黑雨絲斜落因風仄出山回首望山中
黝深嵐嶂失顏色

流螢篇用明王寵韻

斜月涼風罨畫堂暑蒸漸退夜初長草間上下流

螢起葉底縈迴忽現藏小院幽閒靜絕塵繞窗熠
耀逗輝新書帷乍近明細帙更借微颺送過鄰自
炫微光亦可憐緣檐拂檻更窺簾月明遠避羞無
焰雨溼還教強鬪妍金風起兮拂樓殿銀漢分明
感團扇午夜更闌玉露涼欲曉未曉催籌箭畏寒
穩著樹枝頭蛩吟蝶老不禁秋從此韜光隨暑去
感懷空費語冰愁

古琴歌

嶧陽孤桐未易得不遇子期空歎息我今徒作瑤

琴歌况兼雙手生荆棘絕調翻成鄭衛譏廣陵散
失逸聲稀獨憐空谷幽蘭秀漫想平沙落雁飛磊
落襟懷傷大雅駕言幽思憑君寫操縵安絃自有
人紛紛誰是知音者相將古錦製新囊壁上高懸
耀縹緗七絃不動無聲闋斷紋寂寞韜輝光

吹簫詞

碧竹裁簫響徹空燕脂滑潤朱唇融幽揚逸韻繞
房中羅幃香煖生春風柔荑細膩排瓊玉翠翹雲
髻明朝旭雙眉斂恨寂無言只爲吹成離別曲

古銅戈行

土浸沙沈經濕燥堅戈不共將軍老何年劓出落
 人寰得來幸未傷完好戈兮戈兮慨汝何淪落沉
 埋歲月多形質雖然經閱歷鋒銛久已謝消磨不
 殊商鼎周彝古精純翻憶良工苦青皴碧繞色斑
 爛長保堅貞莫朽腐位置芸軒什襲宜端溪毛穎
 共書帷吟餘摩撫增豪氣相對堪除懦弱思曾經
 勇士持排列伐鼓揮旗威猛烈短兵擊刺洞肌膚
 刃鐔遍漬敵人血至今點點珊瑚紅千年以下無

湮滅擬想沙場接戰時夜深風雨停杯說

綠竹引

碧篠參差色淺深渭川嘉種茂成林孫枝挺秀篔
 簹密迸籜過墻已及尋喜汝托根誠得所森森逸
 態凌空舉出水芙蓉比潔清長青松柏為儔侶土
 脉肥腴湛露濃綠陰之下莓苔封曉風料峭敲窗
 細夜月徘徊疊影重曉風夜月添幽景坐對教人
 煩慮屏萬个蕭疎翠欲流閒庭雨後簾帷靜高標
 勁直解心虛守節何妨興味孤一任穠花紛豔麗

歲寒能得雪霜無

夜熱

終朝執熱暮未歇炎歊不隨落日沒仰天四顧淨
纖雲怨咨溽暑忘唐突安得涼風驟雨來當戶開
襟爽毛髮銀河爛漫列星低流汗沾身膩肌骨憑
將一握羽扇揮何能除却煩熱暵絺綌如裘泥殺
人無論冠巾與著鞮擾攘几上晝憎蠅紛紜階下
夜足鑿池邊頻欲去乘涼石堤黑暗不敢越移來
短榻坐庭中四更初見下弦月月色紅蘋吳牛喘

我已畏之心忽忽有飯難喫戀茶瓜豈堪羅列堆
肴核或言運蹇疾作時乖遂逢計與字非我一
人遭遇之人皆畏熱如木訥咸池待及愁鼎沸扶
桑將恐憂煙勃流金水漸涸陂塘爍石山欲融嶽
峯爲民祈雨

聖情殷澤及囹圄清刑罰牧民任用盡賢良以資
調燮絕請謁因何亢旱三伏中愆陽其理難揆厥
鬱蒸深夜更炎赫我欲逃之無冰窟如焚氣結不
可蘇勉強吟詩思已竭通宵不寐起彷徨又看紅

日東方發

辛卯六月白龍潭禱雨是日卽降甘霖用夜

熱韻

途遠未遑解鞍歇地燥沙鬆馬蹄沒靈山祈雨敢
憚勞赤日黃埃且馳突平田皮捲皆龜坼木葉乾
縮如卷髮農夫力作炎歊中揮汗耘鋤疲筋骨而
我行觀若輩勤頓使胸懷忘暑暵臥壟耕牛喘不
休蓬頭稚子無衣韉村屋卑隘蚊蠅繁夜間饒有
墻根蠖潮水狂瀾數丈強只今可以褰裳越惟願

沛澤遍千里好將炎赫消六月天久不雨爍金石
瓣香致敬毋輕忽漫云禾黍焦穗苗會及瓜果爛
根核民情政事兩交修天和可驗星無孛釋茲恒
暘義莫窮謬解旁究詎若訥默禱神明仰祝天俄
見出岫興雲勃疊嶂迴巒妙境幽離宮別殿峙嶄
峩起敬經行不敢停路馬蹙芻禮有罰途遇來往
行人稠童叟絡繹虔誠謁懇顛救我百穀枯關心
怕負春播厥苾芬自昔享馨香潭深信有神龍窟
不然亢旱至三旬清波未見微消竭神感虔敬降

甘膏卽看滂沛迎車發

喜雨三用夜熱韻

朝來零雨暑威歇
靉靄低遮遠岫沒
簷端百道溜潺湲
下注池塘勢奔突
半篙碧浪浥溪毛
數寸甘膏沐石髮
當窗散絲密照眼
入田渥稼潤到骨
衣襟風拂延爽餘
軒檻涼生蘇氣暍
階積水深怯出門
欲行將恐濕鞞鞞
籬根砌角鼠負多
巨者或云能化蠍
竹叢滴雨灑瀟瀟
兀坐靜聽聲清越
一洗炎歊大地秋
定驗爲霖離畢月
小園花木盡滋榮

情景立使興超忽
數旬畏旱喜滂沱
人情非僞洵實核
草色平鋪暗上階
萌芽又見紛甍宇
美茲形狀愧才疎
幾度欲言愁口訥
長空浩渺層靄濃
遙林蒼蔚密霧勃
莓苔綠滿絕塵埃
捲簾貪看雲峰峩
峩酌酒開懷漫嘯吟
泥飲更逾深杯罰
院落人閒愛景幽
自知疎懶少賓謁
颯爽有若已病狂
良醫涼藥瘳陽厥
藏蒲蛙鼓動新鳴
高下來白石岸窟
目前景物引詩情
好供賞玩用不竭
揮毫記事寫長歌
言志以任樞機發

行在恒室初集
焚香四用夜熱韻

沉檀爐熱無時歇軒楹長使篆不沒範模鼓鑄古
製精却異炊煙起曉突紋迴耳腹紐雲雷刻畫纖
細等毫髮純金百鍊空其中溯原乃是山之骨開
礦鑿石冶人勞何論冬寒共夏暘形殊鼂鼎具足
三支撐赤脚脚不韞半炷餘燼著肌膚炙灼傷如
螫人蠍焚香鎮日受清福研究無乃太僭越簾帷
晝下避輕風窗牖夜明邀素月心懷放曠逐氤氳
能令神志隨飄忽靜几惟宜翰墨鄰腥羶毋許置

盤核朝朝芬馥裊龍涎非似招提祝年並禳字有
時閣筆鼻觀通亦學緘口禪僧訥偶將芥片試旗
槍茶煙疊起交相勃默坐房櫳野馬停一縷直上
抽巉峯頻拈險韻咏新詩意思失當恐受罰早朝
每日侍螭均御鑪丹陛叨瞻謁咏物才慚唐李嶠
爲文博遜齊陸厥歌非樂府與柏梁題別飲馬長
城窟幽齋香篆莫窮竭好助吟情隨興發

戒壇古松歌

蟠榦龍鱗閱歲深鬱鬱天矯逗蒼碧勁節時寒然

後知樛枝屈鐵根盤石霜皮怪狀萬千端秀色凌
霄數百尺偃蓋欹側冒招提蕭森能使塵囂隔濤
響晴空風雨來濃陰秋重冷魂魄登岱秦封感舊
聞夏后植社剩陳迹密葉堪容白鶴棲釵股細碎
落風夕更無人至劔茯苓寒巖任養喬松液蠟屐
閑停選佛場山靈應笑不速客丁固功名兆夢中
彭城詩捷限催迫尋幽漫企謝安遊撫松信有陶
潛癖坐對娛情愛景佳遙巒落照楓林赤

題西山諸寺

羣山潑翠邃岩巉岫複峯迴石磴遙古木蒼蒼青
靄重林巒幽靜隔塵囂小憩禪房日停午長空雲
淨春光煦玉蘭燦爛媿唐昌蝶蜂時逐飛英舞潺
湲細溜響清泠松柏當窗翠作屏玲瓏泉韻春冰
脆澎湃濤聲夜雨零濤聲泉韻清而雅靜境惟宜
求諸野游魚飛鳥各忘機性靈藉此堪陶冶仰見
招提隱翠微楓萌櫟茁杏花肥紅垣一抹林端露
古寺春深晝掩扉離宮更在山之曲
翠華臨幸供遐矚至今殿宇鎖重門輦道無人春

草綠

聖人崇儉罷宸游千乘萬騎妨田疇惟見龍潭頻
祇謁爲民祈澤

盱宵憂徘徊不盡登臨意空復山光自明媚憶昔
曾經扈

蹕來老僧尙說當年事

雨窗和韻

深宵臥聽廉纖雨侵曉幽人慵未起起來閒暇軒
窗中筆墨生涯自料理圖書帶潤有餘清花木含

滋無不美愧我勞形案牘煩輸君清福信如此

燕子曲

雙雙拋剪垂楊道營壘新泥連嫩草低言如識主
人憐棲梁似解銜花報一桁珠簾晝不垂三徑落
紅慵未掃任汝相安自在飛將雛莫管韶光老

春曉詞

銅壺漏歇紗窗曉羅幃人起聞啼鳥細雨廉纖引
恨長桃花零落知多少夾岸垂楊綠意多東風吹
縵碧池波春衣欲試從來薄又恐朝寒可奈何

清夜琴興

紗窗春暖坐調琴清冷應知大雅音落指任教分
緩急將心莫使隨浮沉幾疊宮商逗宛轉挑抹冰
絃度深淺風入長松驟沸騰雲歸遠岫遲舒捲人
靜良宵月正明當窗花影印縱橫停琴斂手起遐
思欲彈不彈空復情古調希聲求未得誰是知音
徒歎息

靜坐

志定機關冷心和識見明綠陰隨日轉碧浪過風
平物我原無競禽魚各有情靜中多意味涼向北
牕生

初秋曉霽

昨夜甘霖足雲開曉暢晴潤知苔徑滑爽愛竹窗
清果熟垂枝重波增漲岸平最宜秋稼穡暘雨洽
農情

駿馬

駿驥超羣久來從渥水西性馴神自健力壯齒初
齊蹠躐輕千里迴旋捷四蹄願酬芻秣厚驥首向

風嘶

清秋晚眺

碧宇清無極空明萬象含
飛鴻來遠塞積水淨澗
潭返照殘紅淺長林晚
綠酣秋山饒畫意乘興
試幽探

塞上道中

驛路隨山轉高秋塞草黃
碧峰新沐雨紅葉飽經
霜野渡寒流水平沙淡
夕陽郵亭多客思猶覺
夜偏長

晚宿七家店

沙磧黃茅路人行落照中
野雲籠曲水塞雁唳長
空薄暮千峯紫深秋萬
樹紅停車山店晚木葉
響寒風

己丑中秋後一日澄海樓看日出

碧海接遙空霞光照耀紅
山河明曙色波浪湧秋
風日極層霄上時逢八
月中登臨多逸興朝日
正升東

喜晴

己厭連朝雨侵晨喜放晴爽風乾礎潤霽景煥霞
明經沐林巒濕添流池沼平蔚藍天色淨秋滿碧
空清

秋日卽事

碧落明秋序晴新瑟爽時西風雲縷散南陸日輝
移砌穴寒蛩在梁巢社燕辭誰家深院宇砧杵動
相思

漫成

禮義防閑切疎狂率性真門臨流水靜心愧古人

淳把卷何妨數看花不厭頻平生無所競詩酒自
相親

祈雨後晚宿八家莊龍泉寺

先是予未至龍潭時雖見雲與

斷續而紅日當空炎熱方甚及至龍潭卽沛甘霖拈香時雨尙未止詢於寺僧云已二寸有餘矣四望雲霧溟濛層生疊起雨勢將大至也

感格甘霖沛精虔信不虛雲生隨客騎塵泥到僧
廬田野均沾潤炎蒸遂掃除願將今日爽相送至
皇都

懷柔一帶禾苗復茂詢及農人云甘雨深透

喜而有作

靈液初沾足農人慶解憂田禾看復茂溝澮積新
流路浥時消暑風涼候欲秋轉憎歸轡速未洽踏
晴游

秋日遊西山諸寺

停騎禪房寂清幽滋味濃山深遲白日院靜響青
松石磴盤空疊秋林弄影重畫圖初設色紅葉遍
隣峰

熱河曉起

旅館人初起温暾日上牕林鴉過陣陣檐雀噪雙
雙寒漸霜華漬晨開夜氣降擊衣秋睡足心靜夢
無攪

暮春卽景

一院繁花放時光正暮春暖風晴宿雨遲日麗芳
辰待燕開簾幕留魚罷釣綸園林饒嫩綠佳景最
怡人

微雨卽止

雲起不成雨晚來生薄涼田疇殷沛澤草木畏恒

行有恒堂初集
三
暘波滅沼欲涸塵浮風復揚稀疎地未涇高樹又
斜陽

晴

雨久雲陰重晴新日色明池盈宵漲足簾捲午風
輕嫩碧莓苔長鮮紅菡萏榮幽軒炎暑減小坐識
涼生

咏菊

傲霜堅勁質籬下綻繁英不與春芳伍應知冷艷
貞黃華秋爛燦碧葉露光明采采何妨晚經寒久

更榮

春日卽景

春色郊園滿晴和景物鮮揉藍波漲岸染碧柳含
烟生意池魚躍忘機幙燕還天桃花欲放暖日賣
錫天

雨後卽景

雨餘花木潤生意遍林塘滿院綠陰重一庭清晝
涼忘言思每寂習靜趣偏長入戶薰風至芙蓉遞
遠香

有感

暑退初秋日涼歸薄暮天柳堤閒繫馬槐院罷鳴
蟬無學慙干祿居官避握權持心應鑒水三復伐
檀篇

晚涼

日落晚風前遙林靄碧煙蓮塘歸鷺下蘚砌篆蝸
沿楚簟涼生滑齊紈雨過捐幽齋閒隱几松際月
輪偏

晚晴

久雨川原潤池塘秋水生芰荷香不斷苔蘚碧無
情風爽雲霞幻晴新景物清捲簾看夕照山迴暮
煙橫

雨後曉行密雲道中作

夏雨初晴日山村刈麥時黃雲棲遠畝碧浪漲深
池遙嶺雲歸緩長空鳥度遲朝霞澄爽氣茅店起
晨炊

秋晴卽景

雨沐遙天淨晴新遠岫明階前層蘚積空際薄雲

橫螭腹留香久蝦鬚透爽輕晚涼人靜坐蛩語動
秋聲

喜雨

好雨爲霖日羣生望澤時晚涼祛溽暑新水漲平
池翠重松根蘚黃嬌竹外葵農功欣可補蔬菽播
堪宜

曉起

斜月挂長松東方透曙容海棠春夢破楊柳露華
濃市遠人聲杳窗深花影重分明知起早鄰寺已

晨鐘

春雨

昨宵春雨足幽事動牽縈除草引瓜蔓添籬接豆
棚畦花停灌水園柳薙繁莖損益因其利無非順
物情

初秋晚晴

雨過園林潤蟬聲到處聞當窗菡萏秀纏石薜蘿
紛碧水浮殘照青山橫斷雲晚風祛執熱秋意此
時分

灤陽秋日咏懷一百韻寄友人

客路兼旬久秋深景象遷懷人增旅况極目異山
川遠浦波沉練長空月下弦衣裳霜後薄鈴鐸夜
中傳泥滑初晴雨寒侵欲曙天白沙平漠漠碧落
淨娟娟叫破雲衢雁飛來樹杪泉層嵐爭起伏流
水漾淪漣林仄枝妨帽山深霧溼鞮車遲尋店歇
人倦抱鞍眠綠柳餘殘影黃葵落故妍女墻排嶺
際佛寺立峰巔陣鴿巢高墪吟蛩穴古甌莓苔迷
路徑荆棘護垣塙鳥樂花爲食僧貧草作氈政和

無閉戶農老不離塵鷄犬桑麻裏房櫳碌碡邊魚
苗肥潑刺燕子任蹁躚碧重苔衣積青疎石髮卷
兒童驅犢牧婦媪近波湔竈火燃松葉炊煙熟麥
饅嶺頭樵徑曲橋畔酒帘懸果實垂叢樹禾苗刈
大田風皆尙淳樸地久隸幽燕孚惠征租免推仁
貢賦蠲閭閻淳不二車騎動盈千縣吏供繁役衙
官半冗員苛求傷體瘠奔走驗鞵穿私欲頻頻起
公文故故連衣冠新士馬村落舊人煙是處皆開
宴誰家不列筵停杯因按拍待月漫調絃嘯傲多

昂首卑污驗脇肩青春良可惜白首豈堪憐不辨
光陰速安知景物鮮絺衣渾欲罷團扇暫相捐滿
野生秋意斜陽度夕躔去家思悄悄問渡溜濺濺
日久家童嬾人多地主僂房廬初整頓鄰舍慢周
旋細悟寰中理閒尋物外緣却因癡念障未被慾
情牽學古勤功切存誠守靜專安閒樂有道聽命
處無偏天籟催砧杵塵囂遍陌阡趨炎心匪石近
水屋如船野味菘芽梗蓬窗柏木椽泥沙塗壁砌
杞柳作杯捲菽麥堪充飯棠梨不計錢露菱尖有

角霜栗大於拳瓦缺牽茅補牆低藉竹編蛛絲檐
外網蝸篆棟間涎詩酒供清興圖書得靜便風裁
雲葉瘦雨打浪花圓悶養煙霞癖狂吟笑語顛移
花環砌下植樹近堦前葉小藏寒蝶枝卑隱暮蟬
秋聲悲畫角野卉妬花鈿園菜勞人煮芽茶手自
煎句新煩友定卷舊被蟲鐫草舍疎狂聚朱門士
馬填暮眠深夜後曉起未明先帳薄還同紙衾寒
欲覆緜輕涼纜料峭歸夢總牽纏夜氣侵牕入鑪
香撥火燃星河猶燦爛更鼓苦綿延待漏叨鶴列

趨朝謁衆仙御園波活活上苑草芊芊麗景晴暉

旭溫泉暖溜涓三秋初綻桂八月尙開蓮

此處泉温故入

月仍有蓮花

岫嶂攢成畫池塘不繫舷鹿麋閒濯濯鴻

鵠舞翩翩獻賚諸夷至敷文北漠宣天行原出震
帝德健乘乾勲貴皆多士謀猷仰衆賢幸身非偃
蹇畏事半迤邐駑劣難馴矣高明務勉旃剛強多
易折柔弱轉攻堅豈效蠅隨驥羞同蟻慕羶應酬
須中理言語勿從權禮樂仍繩準心肝暗矯虔處
身同燕雀防患畏鷹鷂失馬翻爲福得魚莫舍筌

薄冰誠戒履朽索慢揚鞭鉗口金人戒沉心玉版
禪佛門修苦寂老氏尙虛元格物思無外持心道
自詮會須明變解且莫悞相沿德業時時進經綸
細細研流年時日急轉瞬歲華遄鞅掌仍今日追
隨憶昔年看山時跋涉臨水愛潺湲膠漆同心重
箴規友道全閒游晨轡並入值夜牀聯燭爲邀談
剪簾因待月褰要言尊一諾夙夜慎三愆佳想應
知否愚情竊慕焉寄言抒素抱投契暢幽悃自愧
雕蟲技強吟咏物篇此情難棄擲聊以寫詩箋

夏日園居二十二韻

消夏園居靜扶疎竹木交路歧分紫陌地敞處金
郊農稼良田茂官途古柳苞參差糴稻黍高下驗
肥磽廣道治平砥通渠滙積均障門山列徑繞舍
鳥爭巢樹密多周匝池清豈混淆低垣蒼蘚合別
館綠陰包家足林泉趣鄰殊市井吹霽饒晨景爽
涼卻午風颯朝退思謙卦時和際泰爻加餐宜米
穀愛物遠厨庖坐對遙峰角行妨稚筍梢勻畦抽
碧菜引蔓結青匏琴領無絃意詩慚滅雨泡近窗

栽小卉傍砌刈叢茅花裏鶯梭擲堂前燕剪拋水
亭翔鷓鴣晴戶挂蠨蛸沈約人憐瘦揚雄自解嘲
苔新沾路滑松老入雲捎妙墨臨池習奇書滌硯
抄放懷幽興逸吟咏漫推敲

帝京詩二百四十韻

岳瀆鍾靈秀升恒鞏瑞祥提封龐德業社稷祝庥
康品物嘉亨熾邦家福祿臧枕峰圍奕奕襟海滙
洋洋宇宙恬熙皞陰晴洽雨暘純禧宏且顯祚祐
壽而昌膺膺寰周甸離離處帝鄉平成超夏禹濬

哲邁陶唐撫育綏陬滋謀猷翊贊襄頻仍調玉燭
悠久固金湯虎踞山形壯龍蟠地勢彊九垓延郡
界二縣判畿疆郭郭俱迢遞郊圻碩孔將宣鰲孚
款塞布惠及遐荒惇睦親宗族旌懲飭紀綱選衡
廉秉直仕宦免離傷菽粟緣淮泗肥腴近督亢帥
希馮異樹民慕召公棠歲吉除災害身宜絕痿瘍
獎由淳藹藹謙替詐佯佯淑善逍遙適克頑警戒
惟駿奔誠舞蹈獻費至梯航朶殿葑萁茨珠樓引
鳳凰鸛鸞班秩秩劍珮韻鏘鏘魚鑰闌更漏螭均

闕闔閭翬飛端寢室雉堞兀垣墻接棟檐楹復連
豐牖檻張透迂遵坦路導洩滌深隍是式威儀訓
循規例案彰羽林標健銳政府蓋助勩俊傑維屏
翰期頤養序庠鴻慈兼弱幼覃錫遍鰥孀計畝勻
輸稅添丁普給糧溝渠消澇患禾麥信豐穰部務
分遼瀋旗顏別正鑲葆幢擡影晃鈴鐸嘒聲缺瑋
瑁攤嵌戶采恩暗掩房疎櫺虛洞澈夾巷仄韜藏
素壁均塗蘂玫瑰墀皎截肪衣冠鮮綵縹燧炬燦輝
煌列陛陳仙仗縈煙裊御香星燈焯爛燦燦黼辰耀

縑緗巨柱加瑩礎重簾挂兩廂臥虹排太液畫鷁
傲迴廊結廡偏剝島渟源滿漬潢展雯暄漾漾欲
曙湛蒼蒼煥抹烘霞逗濃遮密幄障繚墉環左右
聳闕麗中央待潤占舒卷因時喜霈霽禁城人禮
讓上苑鳥翱翔籜迸參差蓼針抽菱葍莒側帆拖
錦纜搖櫓動牙檣合袷犧牲潔齋壇璧瑗瑋類禋
歆降鑿恪夙格蕭薌華蓋裁紋絢雕鞍絡驪驪醴
羹虔祭祀俎豆享蒸嘗獄簡刑稀用官嚴吏避賊
去邪申異命勿貳斷乾剛庶事符千古羣黎乂五

常鞞皮供朔漠毳罽致西羌濟濟忠臺諫彬彬萃
省郎軼倫須駮驥特達薦圭璋蘊石函荆璞儲材
識豫樟匠工渾樸實童叟克溫良貴胄清芬篤元
勳世誼芳幽燕州屬冀齊魯姓多姜卓彼貞臣宰
於昭頌廟堂丕承基億載恭儉緬三皇統緒巍謨
烈絲綸緝耿光貂蠻爭入貢戎狄願來王釋奠欽
先聖開科率舊章廣庭春對策瓊宴午頒觴賦體
涵瀏亮詞涯渺沛滂筆凌嵩岱表氣貫斗牛旁句
騫模曹植聯佳企應瑒委蛇賢管鮑抱負憶韋匡

仇校丹鉛博推敲唱和忙晉堦優論俸教孝聽終
喪卿佐聰治國修辭各擅場作霖瞻輔弼補袞闡
明敷喉舌郵批答樞機凜肅莊徵求憑綺說啟沃
溯伊望出納司唯謹劬勤職所當雍娛遨樂土綽
裕履仁坊乃誕敷文德還充禦敵方逆夷猖犯境
雜虜敢眺梁爰討堅敕械徂征競整裝邊陲曾秣
馬小醜竟貪狼勁旅軍驍勵天弧勇奮揚夜巡營
霧黑暮戰陣沙黃寨守蘆茄脆車改革鼓鏜賊徒
殘敗潰我士愈癡創掣纛干撻鉞孳矛毅挾槍馳

驅疲犬豕掇挽儼蟻蝮駑劣迷爲蛾欻歔數拒螳
協從翻效順怙惡或偷亡智猛恠邀賞逋逃獨受
殃持戈偕突往縱轡控騰驤恐懼悲生捕踟躕就
自戕拘擒囚縛鷺拉拽獲跛牂俘矣恢功令誅之
快斧斨旋師洵赫赫凱撤復泱泱獫狁卑驕傲于
闐早怯悼掌兵伸渙號戍卒却揜攘向化攄愚悃
抒忱慄竦惶懋勞叨大賚考績賀餘慶察宿箕臨
薊澆畦鄴決漳諸衢同軌轍百戲聚俳倡幃捲遲
駟轂騶停脫勒纓援絃諳緩急擊缶亦宮商笙製

吹攢竹璫彈叩八琅閭閣嬉得得闐闐會踟踟貯
庾盈糜芒蒙垆晒醕醇恂儒誇董賈豔質繼施媻
斂袖紈輕軟凝眸目盼眸徘徊姝靜者邂逅敬尊
嫵鬢髮鴉堆鬢犀羈玦飾瓌蕩撓嫻郢客謳曲賴
吳娘富厚彌探蹟輿圖愧較量衝繁南涿鹿扼要
北漁陽永定洪濤觸居庸峙嶺蔣揉藍桃汛漲擁
紺杏花岡崩劣懸崖峭楹杈倒木僵崎嶇尤轟轟
澎湃溘泱泱但覺河流濶那關堰失防堤增牢堵
築湍湧濁砰磅紵裕粗麻泉泥坯賤瓦甌桔槔扳

栲栳井盃振淋浪阻壩淤蓬柁容舫撥舳艫窶貧
蠲酷派霉變罷賠償鎔鑄銅催運綢繆米置倉耘
糗厘播穀杵臼慢春糠蓑笠農攜鎛蒲鞵犝服箱
荏蕕纏束帚畚鍤冶團鋼糶足饒遺滯存知備歉
歎鍛鋤與耒耜銷刃沒鋒鋟卽此田原阜茲焉獸
畜僮柙籠跽赤豹園囿豢銀麀狡兔毚踪遁雄狐
曳尾跟菟苗盤駮駱網罟取鱸魴荷筍看擔卉聞
簫認賣餽藥欄朱頰杞蔬圃白芽薑佛寺紆鐘梵
村塍藝稻梁坡坨鋪苜蓿埤塹茁葭葦襍穢監眠

犢偃僂苦插秧陸途乘驛騎江面駕舩艍窄沼層
砥渡幽溪一葦杭黍稌秋可卜果蔬熟非穉韶景
蕃英綻隆冬冷霰雱素娥輝皓月青女耐霏霜院
萼初棲蝶衙槐已噪塘候諧蘇疾疫雪溥淨蝻蝗
少婦忽編箔饑蠶起飼桑蠹蛾纒蛻繭茂葉住盛
筐慎蜡崇收穫迎儼俗祓禳鳴條颺淅淅溥彩露
灑灑共悅年登稔咸怡稼勝稂亂螢纖熠燿婁語
泣蛩蟹伏臘隨寒暑絺裘迭煖滄藪窠名角翅漈
翥數鱗鷓水介哦螺蚌昆蟲寫好妨鵠翎騫利翮

鶴唳戛員吭邈迤翩鷗鷺噉喙泳鯉鱗背風巢鶴
鵲祛早現鷓鴣穿屋憎馴雀欵陂暇睡羊依菱雛
鷓鴣集藻嫩鯉鱮鸚鵡羞鸚鵡鴛鴦訝鷓鴣解水
鱖躍鯽搓絮驗浮鮒隼鵠羈絛錠鷹鷂捷掠搶過
禽捎草莽窟蟹託池塘躑躅資銜啄蹠躑任鵲鳩
寥空閒淡淡朗日照滄滄舩翼斜拋剪鶯歌巧弄
簧梧桐招翡翠茵苔眷鴛鴦麋塵窺蒿畝獾狸匿
岸磻穠葩妍旖旎細柳態颺颺荇菜波牽帶芙蓉
曉試妝挺株喬檜栝篩个鬱篔簹綠見萋叢菊紅

菲附架蓄梅橫殷染繪榴折絳垂囊茉莉馨
茶蘼蔭罩牀猗蘭蕤窈窕穉筍產簷簷構宅珍
梓揮斤尙桷采崢嶸萌橘柚葱蒨匝榆枋漆櫟
梨棗棕櫚豈椽檀酥融嘉膩乳瓜剖釀甘漿沁
齒休歆熱扶脾擬蜜餠柏松天矯敲柰李疊稠
行荔翳樛榛栗櫛參灌柜柳踈枝扔劃槩側篠
繫游縵窰刺芟苕棘繽紛蔚棣糖砌前茸菽莢
窗畔嫋萸楊積篔簹屯垵滌涓溢瀉澆茅亭澄
霽霽芝館冒筠篁靉靄雲歸岫潺湲瀑注涯短
籬栽薜茑極浦

種菰蔣放棹棕瀟灑移舟際浩汪釣竿鈎墮餌
罾或趁驚根川遂氛冥杳颺森泚汨湟汀洲淹
澗澗透瘦怪奇疆溼徑斑苔蘚低藩蔓荔芡藤
鬚嬌宛轉楓本老撞搪甲第奢軒榭綈袍繡
襖設筵羅妙饌喚伎炫瑤璫蓮藕通其節橙柑
美在勳琵琶譁索索磬笛逸喤喤削鯉脂烹膾
庖幢髓煮腳奏琴專操縵撼悅響琤瑤軸笈芸
簽秘簪纓檠戟藹秦書程邈篆漢器武安鈔榻
下賓留屐輪煩僕止曠有才傾肺腑無病到膏
肓被褐能懷寶嗤圓愛

飲汙投壺嘲迫促習射雅趨踰柔燥拈膠榦玲瓏
鏤鏤錫伐鼙搗坎坎破的志僨僨象弭盧弓弩注
駒汗血駟廢餐心刻切窘步意顛狂忖度耽搔首
尋疵默理裳愜題疑髣髴進牘惑彷徨彖譯含爻
內篇寬碍字妨麟經箋杜預詩傳證毛萇斟酌憐
何謂磋磨惜未遑審音搜律呂擇友愠炎涼楮墨
冲情暢筌蹄味道長逢難諉繾綣逞易陋披猖薄
酒愁堪遣徐吟誌不忘醒醒咀豈蔻散脹食檳榔
涉趣欣如笑言哀歎若甍仰觀忪徙倚俯視悵徬

徉寂寞奚孤拘沉潛晦激昂駢并怍脉脉慘澹走
俛俛寄想嗟高遠冷泉逮濯湘辱榮權損益感慨
係彭殤代謝違爐箠遽廬覆混茫力微譏擻揭學
淺誚交相祖述沿根柢岨岨造勉費錙銖乖瑣屑
訛謬錯毫芒研鍊思皆盡都京典莫詳精神窮萬
仞稍助與枯腸

己丑中秋山海關天后宮玩月

皓月中秋滿長空萬里晴征車停日落古寺對潮
生玉宇無邊淨冰輪分外清俯臨滄海濶仰見斗

星橫夜久人俱寂風恬浪自平影光雙皎潔天水
各晶瑩湛露侵衣重涼颺拂面輕疎窗延爽氣小
酌引詩情志與澄波定心慚素魄明良宵逢勝景
不寐到深更

寄裕容齋都統十二韻

君作灤陽牧名譽信不誣政刑清且簡德澤惠能
孚部伍昭嚴肅衙官奉楷模署寬依苑囿門敞近
街衢動靜言行慎維持道義扶俗淳惟僻縣任重
是邊隅每治公文外還叅內典無塞垣天颯爽山
嶺路崎嶇別緒關河阻離羣與味孤有懷吟短句
莫禁氣長吁賦咏今時寄追隨昔日俱憶人千里
遠落筆漫踟躕

賀韓厚卿孝廉移居

吉卜從龜筮移家殼棘車誅茅同宋玉作賦擬相
如壁有延陵劍齋多鄴架書軒窗宜誦讀城市遠
樵漁雁序聯張陸鴻名並應徐長歌恒五夜短景
惜三餘宅看文星聚鄰應孟氏居屋良因富潤德
積會官除輪奐雖洵美經營亦不虛春花爭茂密

行在懷堂初集
夏樹繞扶疎冷落王猷竹清高仲蔚廬五家須洽
比澆灌念同渠

奉寄隆雲章閣學十四韻

投筆綏夷壤深知銳志雄大才無不可廣畧有何
窮尙儉堪敦俗忘勞見竭忠建旄開府幕駐馬梵
王宮奉使三年客辭家萬里蓬車曾穿鳥道馬已
度蠶叢惆悵炎蒸裏馳驅雨雪中安邊思定遠化
蜀近文翁風土殊燕薊山川異華嵩張騫曾出塞
馬援未言功應念甘棠召還希大樹馮維持欣素

守道義信長充尺牘煩頻復郵籤喜可通願期勤
謹意慎莫異初終

行有恒堂初集卷上終

海昌許誦恆漢
陽葉名澧謹校

程